

Profet Malakaigo Po Asəai

Buku

Hasia nedebō po

Te profet Malakaigo agai po te gasa meba profet dabego pusai madi nosali pusai dao. Te sogo te Juda dabego Godigo tempel be Jerusalemde polo dodola silai digi dao. Godigo be da polo elaluali goli, te Malakai agai suali, te ofa ebo kolesaga dabe me lotu po wabo kolesaga dabe dolo me elalubo sube. Tama tibaso, agai te pris dabe ebadi te we bidi dabego homu kolesaga dąu walabo po pusali, te augwaligo Godigo gedude doloba pai kolesaga augwaligo wali pomainu.

Malakaigo Godigo dąu wali kontrak pode po hauwa pusali. Agai te Juda dabe te kontrak dologode bidao po wali. Te bidi dabego augwa we dabe dali dagana selama elaluao, tama augwali te doloba pai kolesaga ebo we bidi pedelaibao. Malakaigo te sęęe sabo kolesaga po pusuyu, me homu begelebo po pusali. Tama agai Genuai Bidigo tempel be me sogo posabo po wali, tama Genuai Bidigo tigidali we bidi ebo kolesaga dagalabo po wali.

Malakaigo sabi simanibo po te Elaija bolo hasia aselama, tama nosali Godigo agai yaibao olama dąu wali tama yaibao. Te da wiegi yai po dao, te profet dabego buku silagasiyu wabo po, tama te pogo dago homu kolesaga kegelama, tama Godigo gesi noma kontrak aga we bidi dabe dali dąu wainu yaliba kegasa palio, tama me

Profet Malakaigo Po Aséai Buku 1:1ii Profet Malakaigo Po Aséai Buku 1:4

te wiegi yai po page gagalaliba me. Te ensel bidi Gebrielgo te pris bidi Sekaraia aga te Jon bidi baptais ebo bidigo aya pedelaiba wali sogo, enselgo te Malakaigo profet po te Jongo usu naibao po wali. Te buku Luk 1:15-17, tede suao.

Godigo te Israel dabe godolo mu yali po

¹ Te Genuai Bidigo te sègè yai po Malakaiba menama, te Israel dabeba pusumainu yai dao.
² Genuai Bidigo te tama po wali, “Te eno dage godolo mu edualи, tama megì me ebo dao,” wali. Tiali goli, te Israel dabe augwaligo e tama po wei ponani, “Nago da godolo ebo mena tama yaliwe?” Tialima Genuai Bidigo te po augwaliba wei ponani, “Odiào. Polobadu Iso me Jekop te ama nami si dao. Te eno Jekop dali, dage te agai wäi nöq dabe dali godolo homu yai dao.
³ Tiali goli eno te Iso dali te aga hani wai dabe dali godolo homu me isawai, augwa te nogi Idom poali. Tialima eno te Isogo bulu du bage pesage dolama, te eno agai bulu tq dage te bulu hasa dabego dwai pesage pedalumainu ilali,” Genuai Bidigo te po wali. *

⁴ Te Idom dabego te po weyu, “Te dago taun dabe dolalio, tiali goli te dago ma nigaibao,” wabo. Tialima Genuai Bidigo augwaliba te tiwai po wei ponaibao, “Duga ma da nigaibao, tiali goli te eno augwali ma aluama dolaibao,” wali. “Te gasa hani dabego te Idom dabe nogi te tiwai nogi yaibao, ‘Te dwai hani bage dao, te Genuai Bidigo sesemane sogo augwaliba wado po weyu, haliga

* **1:3:** Rom 9:13

Profet Malakaigo Po Aséai Buku 1:5iii Profet Malakaigo Po Aséai Buku 1:8

sébę ebo hani bage dao,’ te po waibao,” wali.
5 “Dage Israel we bidigo te tebo sé te duga gedugo
digi sueibao. Tama dagego te po weyu, ‘Genuai
Bidigo bomo te umabo mu da Israelgo bulu tō
kantride elalu, te dago bulu tō pedai bogo badu
me te usu nai dao,’ po waibao,” Genuai Bidigo te
po wali. *

Genuai Bidigo te pris dabeba wado ilali

6 Te Tigidali Bomo Elalubo Genuai Bidigo te
tiwai po te pris dabeba wali, “Ogwago te aga
ayago po wali peyu, te aya dologode bidaibao, me
te sé ebo bidigo me te aga tonalubo bidigo po wali
paibao. Odião. Ena duga aya dao. Magi baso
dage ena dologoba aselama bidisabó meniwe?
Ena duga tonalubo bos bidi dao. Magi baso
dagego eno po wali pisáma ebawé? Dagego ena
tudiba muyu, te eno nogi te olo nai dao homu
eyu ebo dao. Tiali goli dagego enaba hanalu,
‘Dago magi ilama nage tudiba mubawé?’ te po
wali. 7 Woo, megí eno dagego ebo kolesagade
po obao. Dagego eno altade dwai ofa yali. Te
nosali dagego enaba hanalu, ‘Dago nago nogi
magi ilama aiyaba elalubawé?’ wali. Tialima
megí eno dagebolo obao. Dagego eno alta te olo
nai tiwai da homu elama, tialima dagego eno
nogi aiyaba elalubo dao. 8 Te dagego gedu widai
kibu hasa me deli te sela pelama, dagego enaba
te ofa ebo sogo, dagego te dolo sé eba homu ebo,
agawé? Dagego te gasi yai kibu me, ságä togwa
pai kibu sela asiyu, dagego te dolo da homu eba,

* **1:5:** Ais 34:5-17; 63:1-6; Jer 49:7-22; Ese 25:12-14; 35:1-15; Amo 1:11-12; Oba 1-14

agawe? Te dagego te tiwai kibu me deli te duga gavman polalubo bidiba mobaso, te agai dageba wiegi yai homu pemene eba, homu yaibawe? Ma, dagego homugo te agai dageba wiegi yai nai me deli wei ponaibao homu yaibawe? Mu menio!” Tigidali Bomo Elalubo Genuai Bidigo te po wai. *

⁹ Ae, dage pris, duga te Godiba hanalu te agai wiegi yai sə daba emainu homu yali. Tiali goli, te agai dagego gedu haluasa po me odogobeo, tama te sə yali page dego dawe? Te dugade digi dao. Magi baso meni, dagego agaba te dwai hasa dabe sesiyu, te ofa emainogo yali. ¹⁰ Te Tigidali Bomo Elalubo Genuai Bidigo te po wali, “Te bidi me deligo eno be sunumi dabe palibaso da, teda dage te tomoba me pisəma, tama eno altade te dwai ofa dabe yabo sia me udulugobeo. Te usu dao. Magi baso meni, eno dagego ebo kolesagade wiegi yai pemene homu me ebeo. Tama te dagego enaba sesebo ofa dabe eno me sogobeo,” wai dao. ¹¹ “Te tigidali bulu tə kantri we bidi dabego enaba genuai nogi mawaibao. Te tigidali bulude bidi dabego te wiegi yai denami ofa hano iliyu, te tobage wiegi yai ofa dabe enaba mawaibao. Te tigidali we bidigo ena nogi ugwaba saibao. ¹² Tiali goli, dagego eno alta te olo nai da po weyu, te dagego duga digi homugo godolo isəbo nai dabego enaba ofa yilio. Tialima dagego ena nogi ugwaba me sabeo. ¹³ Dagego te tama po wabo dao, ‘Iya, da te ofa ebo hagela ebao.’ Te po wabo dao. Tialima, dagego ena

* ^{1:8:} Bom 15:21

godolo homu meni isawai. Dagego te bulu uni hasa dabego elai kibu hasa dabe te ofa yali. Dagego te kibu me hasa te gasi yai, ma te ságä dwai sela aselama, ofa ilali. Dagego homugo eno te nai saiba homu elama eba, agawe? Menio. ¹⁴ Ena Genuai Bidi, eno te po wali, te tibo po wabo bidi dolaibao wali. Te tobage bidigo te wiegi yai omai kibu te banisde elalu, te enaba mawaiba po daq wali, tiali goli agai te dwai kibugo ofa ilali. Te kolesaga dolo me ebeo, magi baso meni, ena genuai king dao, te tigidali hani bidi enade wi elama, te ena dologoba pelama bidibo dao. Tama tibaso, te wiegi yai nai naga enaba te ofa eyu mao,” Genuai Bidigo te po wai.

2

¹ Te Tigidali Bomo Elalubo Genuai Bidigo te pris dabeba te tiwai po wali, ² “Eno dageba te bomo yai po me deli elalubao. Te dagego ebo së tigidalide te eno nogi uwguba sião. Te dagego eno po odisáma, te dage hagoma naga eboso da, teda eno po bomonama obaso, te dage dolaibao. Te duga sëde sabo te wiegi yai nai dabe te eno dolaibao. Te mu tama eno tiai dao, magi baso meni, dagego homude eno olo po te oba olama, te dagego eno po wali pabeo. Tialima eno dage dolai dao. ³ Te eno dagego wai dabeba dwai dene mayu, te eno dagego gesabidide te ofa ebo kibu dabego di pilabao. Tama eno dage te kibu sibi dabe haliga sábo pesageba sela sáwaibao. ⁴ Eno te tama tebode dagego koneagameo, eno te bomai po dageba mani homu yaibao. Dagego eno po wali pobaso da, teda eno dage te pris

dabe dali däę wali te bomai po, te Livai hani wäi nöę dali yali po me bologobeo.” Te Tigidali Bomo Elalubo Genuai Bidigo te po wai dao. *

⁵ “Eno te däę wali bomai pode, eno te pris dabe hani tqde sesabi elama bidimainu ilali, te augwaliba bugagia bidabo po mawai. Eno augwaliba tama tiali, te augwaligo ena nogi uwaba somainu yilio. Hasia augwaligo ena nogi uwaba siyu, te ena dologode bidali. *

⁶ Augwaligo dolo yai kolesaga te we bidi ola mawai. Augwaligo te dwai kolesaga augwali me ola mabeo. Te augwali ena dali bugagia dugulaluali. Augwa te wiegi yai kolesaga wali peyu, te augwaligo gasa we bidi hauwa tau siyu, te augwa dwai kolesaga tudiba muai dao.

⁷ Te pris dabego sę dao, te we bidi dabego ena bugagia konemainu ola mabo sę yao. Te we bidi dabe augwaliba pelama, te eno homu bugagia konemainu yao, magi baso meni, te pris bidi dabego te Tigidali Bomo Elalubo Genuai Bidi eno po pusumainu ebo bidi dabe dao,” wali.

⁸ “Tiali goli dage pris dabego eno doloba pai sunumi tagalalio. Dagego te haniani skul wabogo te we bidi hauwa kekelama, te augwaligo dolo meni isawai tobage kolesaga ebao. Mu tama, eno dage te Livai dabe dali däę wali po te dagego bolali dao. ⁹ Dagego eno po wali pisawai. Te eno po dagego te we bidiba ola mawainu ebo sogo, dagego te we bidi meba homu bega sabo po weyu, te meba wado po weyu, tama tebogo te po tü dolo bugagia dodolobo menio. Tama tibaso,

* ^{2:4:} Nam 3:11-13 * ^{2:5:} Nam 25:12

Profet Malakaigo Po Aṣeai Buku 2:10vii Profet Malakaigo Po Aṣeai Buku 2:14

eno digi te Israel dabego te dage hagela homu eyu, dage tudiba mumainu ilalio,” Genuai Bidigo te po weyu, tama Malakaigo pusali.

Te Israel dabego God tagalali

¹⁰ Da tigidaligo Aya te deli naga elalubao. Te God deli naga te agai da nigali. Tialima, magi baso dago te dena abagi dabe dali dą̄ wali po bolobo dawe? Tama magi baso dago te dena wai nq̄ dabe dali dą̄ wali kontrak po te dago wali pabewe? ¹¹ Polobadu te Juda dabe me Israelgo te Godiba po dą̄ weyu, te augwaligo agai po wali paibao po wali. Tiali goli, augwaligo te dą̄ wali po bolalio, tama augwa te dwai s̄e mu me deli yalio. Te bidi dabego te tibo godiba lotu wabo gasa hani we dabe salio. Tama te tiali kolesagade augwaligo te Genuai Bidigo be meda mu ilalio. ¹² Te Genuai Bidigo te kolesaga ebo bidi dabe te sela s̄ayu, te da Israel hani tomode bidimainu me elamuo wali. Tama tiyu, augwaligo te Tigidali Bomo Elalubo Genuai Bidiba te ofa sela pigio wai dao. ¹³ Tama eno dagebolo te dagego gasa dwai s̄e me ebo po obao. Genuai Bidigo te dagego agaba sela pabo ofa umabo hagela eyu, te me sogobeo wali. Tama tibaso, dagego gela weyu, te i dwai weyu, te gela kugai ą̄j te Genuai Bidigo alta daiba gealubo dao wali. ¹⁴ Tama nosali dagego te Godiba hanalu, te tiwai po wali, “Magi baso nago dago ofa sabo meniwe?” E tiwai ebao. Genuai Bidigo koneani, dagego te duga ogwa bidide sali we dabe sela s̄awanigo te duga dą̄ wali bomai po bolalio. Te we dabe duga hai namu dao, tama duga te God gedude po dą̄ weyu, te dagego

augwali munu me tagalogobeo wai. Tiali goli, dagego te bomai po bolali dao, wali. ¹⁵ Godigo te dage bidi me we deliba selama bidimainu eyu, te homu kolesaga tigi deli mu pedalumainu ilali. Godigo te sè yali kolesaga page magi baso yaliwe? E tiwai yai. Te dago wai ame nenama, tama augwa te Godigo hani mu pedalumainu yalio. Tialima te dage bugagia dua dao, te dage we de bidi si deliba daganani sogo te dàq walali po te dagego me bolamu dao, wai. ¹⁶ God, da Israel Genuai Bidigo, agai te po wai, “Eno homugo te wego bidi tagalama penani eyu, bidigo we tagalama penani eyu ebo kolesaga, te eno hagela homu mu ebo dao,” wali. “Eno homugo dage me deligo te tobage dwai kolesaga mu te aga wede ebo te eno hagela ebo. Te dage dua dao, te dagego duga we dabe dari bugagia bidainu dàq wali po te me bologio,” God Genuai Bidigo te po wai dao.

Genuai Bidigo bodolu si te pade dao

¹⁷ Dagego te haniani po hauwa obaso, tama Genuai Bidi te pode hagela yalio. Tiali goli, dagego te tiwai po hanalu wali, “Dago mena po obaso, te Genuai Bidigo dade hagela homu ebewe?” Dagego te tiwai po obao, “Genuai Bidigo homude te dwai sè ebo bidi te augwali wiegi yai bidi dabe da waibao, po meni, te agai augwali godolo eba homu yali.” Tama dagego e tiwai po weyu yali, “Augwa te po weyu, Godigo te doloba pai kolesaga ebo dao wali. Tiali goli, dago aga te dwai kolesaga ebo bagede te tama tebo subeo,” wali. Tama tibaso, agai dagego te wabo pode hagela homu mu ebo dao po walio.

3

¹ Tialima, Tigidali Bomo Elalubo Genuai Bidigo po wei ponoyu, te tiwai wali, “Te eno po pusugi pabo bidi me deli te eno sunumi dodoligi po-mainu polasa tagala palaibao. Dagego te Genuai Bidi asobo tonalubao, tialima polo tama aselama, te aga beba bidagasaibao. Dagego te eno po pusagasobo bidi suabo homu ebo wida, te suiəo. Tialima, aga asobo te eno dąq wali kontrak po pusagasasaibao,” te po wai dao. *

² Tiali goli, Genuai Bidi aga asobo sogo, dego te po tų ebo ugwaba ela holobo usu egowe? Aga te pepeli diliba pedalubo sogo, de te me hagagobewe? Aga te sia posolo mu elasa asobo tiwai eyu, te silva me gol hogomu pobele bage sela səbo tiwai yaibao. Tama aga te meda yai ugwa te sop dali wę dali sigo telabo tiwai yaibao, te meda mu sela səwaibao. * ³ Aga asobo te tigidali we bidigo kolesaga dagalainu asaibao, bidigo te silva siaba ulama, te dwai hogomu sela səbo tiwai yaibao. Te tiwai te Genuai Bidigo sę bidigo te pris dabego dwai meda yai kolesaga sela sənana, tama augwa te Genuai Bidiba wiegi yai ofa igi peyu selasa paibao wali. ⁴ Tama nosali te Jerusalem dabe me te gasa Juda pedai badu augwa te wiegi yai ofa Genuai Bidiba eyu, te polobadu yali tiwai eboso, tama Genuai Bidigo te augwaligo ofade wiegi yai pemene ma yaibao wai dao.

⁵ Tigidali Bomo Elalubo Genuai Bidigo te po wai, “Eno dagego kolesaga dagalainu asaibao,”

* **3:1:** Mat 11:10; Mak 1:2; Luk 1:76; 7:27 * **3:2:** Ped 6:17

wali. “Te polo tama eno te we sali tomode dolobo sé eyu, te pobi wabo bidi dabe po tü iliyu, te tibo po kotde pusuyu, te tonalubo bidi dabego te augwa sé bidi bugagia me abeligobeo, te we dabego tigidali doado bage sabo bidigo te muma sabo po weyu, te augwa bidi isai we dabego doado bage me siyu, te augwa aya isai wai dabego doado bage me sali, te bomai po boloyu te gasa tó kantridu asai bidi dabego nai me sali. Te tigidali bidi ena dologode me bidibeo, tama tibaso te eno augwali po tü ilaibao,” wai dao.

Te Godiba nai me badu mabo kolesaga po

⁶ Genuai Bidigo po ma weyu, te po wai, “Ena naga ena Genuai Bidi, tama eno homu kolesaga me hasegeligobeo. Tama tibaso, dage te Jekopgo bulai wájigo wai dabe, dage tigidali me hagabe dao. ⁷ Dage te duga bulai wáj dabe te polobadu bidali tiwai tobage naga dao. Dagego eno bomai po tudiba munama, tama dagego wali pabeo. Tialima, te dagego dwai kolesaga tagalama, te enaba ma asobaso da, eno me eno te haliga sébę ebo tagalama, te dage ma saibao. Ena te Tigidali Bomo Elalubo Genuai Bidi, eno te po walio,” wali.

“Dagego te po obao, ‘Dago mena sé elama, nageba ma asaibawe?’ te po wali. ⁸ Tialima eno dagebolo obao, dagego eno nai wi sali. Dagego homugo te dwagi yai kolesaga da homu eba, agawe? Mu menio. Tialima dagego e tama tebo dao. Nosali dagego enaba ma hanalu wai, ‘Magi ilama nago nai dago wi saliwe?’ Te bomai pode enaba mao wabo nai te dagego ma tolalubo

dao. ⁹ Mu tama, eno po bomo ebao, dage tigidali dolaibao. Magi baso meni, dage tigidaligo eno nai wi sabo dao. ¹⁰ Dagego duga doado bage tigidali dobolama, te nogo si pedai elaluyu, te me deli te eno beba sesao wali. Tama eno sę bidi dabego nai hauwa elaluabao. Dagego tama tibaso da, te eno wiegi yai doado bage hauwa umabo dageba mayu, te dage me sqa pogobeo, te nai mubo madi te usu egobeo. Te sunumi wali pobaso da, te dagego koneyu, te eno po tigidali mu po dao waibao. * ¹¹ Dagego tama tibaso da, teda eno te dwai osogani dabe paniama, te dagego gi nai me dologobeo. Te ni wain du te dagego wain gide mu pagana paibao wai dao. ¹² Te gasa kantride bidibo bage tigidaligo dage sulama, tama te po waibao, ‘Augwali bugagia mu bidibao,’ waibao. ‘Augwali wiegi yai pemene umabo mu yaibao,’ waibao. Magi baso meni, te dagego tq te bugagia dugulalu bidabo pesage elalueibao.” Genuai Bidigo te po wali.

Godigo augwaliba te olo tau sabo wiegi yai kolesaga yaibao po wai

¹³ Genuai Bidigo te tiwai po wai, “Dagego te po dwai hauwa enaba wali. Tiali goli, dagego te po hanalu obao, ‘Dago mena po dwai nageba waliwe?’ Dagego te tiwai po walio, ‘Dago te Godiba lotu obadi goli, te Godigo da tau me sabeo,’ po wali. ¹⁴ ‘Magi baso dago agai po wali pobawe? Te Tigidali Bomo Elalubo Genuai Bidigo gedude dago dena yali dwai sęde homu dene

* **3:10:** Prs 27:30; Nam 18:21-24; Bom 12:6; 14:22-29; Neh 13:12

yali, tiali goli agai daba te wiegi yai nai deli wei me ponobeo. Tialima, magi baso dago olodali homu dene yaibawe?” te po walio. ¹⁵ ‘Dago te hagoma ebo bidi dabe bugagia bidiyu pemene ebo suali. Tama te dwai kolesaga ebo bidi dabego te doado bage hauwa elalubao, tama augwa te God usu sabo tobage kolesaga yalio, te augwaliba dene mabowe, ma meniwe, te suainu tiali. Tama Godigo augwali me dolisawai. Mu menio.’ Dagego te po wai dao,” Genuai Bidigo te po wai.

¹⁶ Nosali te Genuai Bidi dologode bidama agai po odali we bidi dabe, augwa haside digi po miani, tama Genuai Bidigo augwaligo mibo po odalio. Tama Genuai Bidigo te po wai, tama te dagalude augwaligo te we bidigo nogi aṣeai elalubo buku me deli nigali, tede te Genuai Bidi dologode elalu, te agaba homu begi pai we bidi dabego nogi elalualu. ¹⁷ Tialima, te Tigidali Bomo Elalubo Genuai Bidigo te po wali, “Te hani dabe te ena hani naga bidaibao. Te genuai side bodolu eno muani, te hani dabe te eno we bidi mu bidaibao, te eno godolo ebo hani mu dao. Tama homu dene eyu, eno augwaliba te olo tau sabo wiegi yai kolesaga eyu, te aya me deligo te wai dabego ayago sẹ eboso, te olo tau mabo wiegi yai kolesaga ebo tiwai yaibao. ¹⁸ Tama tiyu, te sogo te ena wali pabo doloba pai we bidiba eno ebo kolesaga ma suiyagameo, te eno dwai bidi dabeba ebo kolesaga, te augwaligo eno po sela sábo dao, te bageba me eno ebo kolesaga suiyagameo,” wali.

4

Te Genuai Bidigo bodolu si pedelaibao

¹ Te Tigidali Bomo Elalubo Genuai Bidigo te po wai, “Bugagia odiqo,” wali. “Me sogo bodolu si pedaliyu, siago te hagoma ebo we bidi tigidali me dwai se ebo we bidi ulaibao, siago te wa pai kala dabo tiwai yaibao. Te side te siago augwali dolama, tama augwali tigidali mu silaibao,” po wai dao. ² “Tiali goli dage eno po wali pabo we bidi, te eno bomogo dage ma saibao. Eno bomo te giliga ulago bomo tiwai elalu, tama dage we bidi te giligago tigi dili ilibo tiwai yaibao. Te dage wiegi yai pemene eyu, te bulmakau wai dabe te banis tomode bidai te buluba dinibo side te sasa mano pabo tiwai ebo dao. ³ Eno te se dabe ebo sogo te dwai se ebo bidi dabe dagego aiyaba elalueibao, tama augwali te tq hogomu agabo tiwai yaibao,” wai dao.

⁴ “Dagego te eno se bidi Moses nogoba te Sainai bulu dude mani po dabe me bomai po me te munu me tagaligio. Eno te po agabolo mani te tigidali Israel we bidigo wali pomainu yai dao,” Genuai Bidigo te po wai.

⁵ “Te dwai siago te dwai se ebo bage dolabo bodolu side te eno side te genuai si ebaso, te we bidi tigidali te wi dwai mu yaibao. Tiali goli, hasia bolo te eno profet Elaija te dageba tagala palama, tama nosali te si pedelaibao,” wai dao. ^{*} ⁶ “Tama agai te aya me wai dabe te deli haliga pedalumainu ilama, tama augwali tama

* ^{4:5:} Mat 11:14; 17:10-13; Mak 9:11-13; Luk 1:17; Jon 1:21

Profet Malakaigo Po Asəai Buku 4:6xiv Profet Malakaigo Po Asəai Buku 4:6

meni eyu da, teda te eno dagego bulu tq kantri
dolaibao,” Genuai Bidigo te po wai.

**Godigo dwagi yai po buku
The Holy Bible in the Dadibi Language of Papua New
Guinea
Buk Baibel long tok ples Dadibi long Niugini**

copyright © 1987, 2001 Wycliffe Bible Translators, Inc.

Language: Dadibi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-22

PDF generated using Haiola and XeLaTeX on 11 Nov 2022 from source files dated 9 Oct 2020

f3fb5335-7c77-5120-883d-cc05478d7362